

„Sco um e femna ha el scaffiu els“
(Gen 1,27)

In plaid tiel sacrament dalla lètg

Brev pastorala per la cureisma 2011

da

msgr. dr. Vitus Huonder

Uestg da Cuera

Frars e soras el Segner

Oz, l'emprema dumengia da cureisma, meina nus la lecziun ord il cudisch Genesis anavos alla damaun dalla scaffiziun: „Dieus il Segner ha formau il carstgaun ord tratsch e suflau flad da veta el nas ad el; aschia ei il carstgaun daventaus in esser vivent.“¹ La cureisma ei in *temps da ponderaziun e dalla renovaziun dalla cardientscha*. Quei temps duei pia era regurdar nus che nus essan scaffiziun divina e che nus vein retschiert nossa veta da Diu. El duei era gidar nus d'anflar puspei nossas ragischs e da scuvierer danovamein il plan da Diu per sia scaffiziun.

Um e femna el plan dalla scaffiziun divina

Il plan divin dalla scaffiziun cumpeglia era l'esistenza da *um e dunna*. Aschia legin nus egl emprem capetel dil cudisch Genesis: „E Dieus ha creau il carstgaun tenor sia semeglia, tenor semeglia da Diu ha el creau el, sco um e femna ha el scaffiu els.“² La scaffiziun dil carstgaun constituescha la cuminanza unica denter um e dunna: *la lètg*. Il secund rapport dalla scaffiziun muossa quella verdad cul impressiunont maletg che um e dunna daventan *ina carn*³. Quella formulaziun accentuescha la viva unitad che seformescha entras la cuminanza matrimoniala denter in um ed ina dunna. Um e dunna formeschian in unic organissem vivent. En quei consista la raschun che la lètg ei nunsligieivla. Esser unius en ina carn paleisa da l'autra vart era che la sexualitat dil carstgaun ei da veser en connex cun la lètg.

¹ Gen 2,7

² Gen 1,27

³ Gen 2,24

La lètg tenor l'instrucziun da Cristus

Sche nus continuein da leger la lecziun dad oz, udin nus dalla malobedientscha dil carstgaun viers Diu e viers sia ordinaziun. Cheu vegn plidau dil pumer dall'enconuschientscha e ch'il carstgaun astgi buca sesurvir da ses fretgs: „Da quel dueis ti buca magliar; pertgei schi prest che ti maglias da quel, stos ti murir“, di Dieus⁴. Mo il carstgaun fa buca stem dall'instrucziun divina e fa puccau.

Ella brev als Romans regorda nus sogn Paul ch'il puccau dil sulet carstgaun stgirenta il bien plan da Diu per sia scaffiziun ed ha purtau il mal el mund: „Tras in sulet carstgaun ei il puccau entraus en quest mund e tras il puccau la mort...“⁵

Era la *relaziun denter um e dunna* ei vegnida tangada da quei mal. Il carstgaun basegna era arisguard la lètg sanaziun e spindrament. Quei muossa Niessegner cu ils farisès fan valer che Moses hagi lubiu da relaschar ina dunna ord la lètg. Jesus rispunda: „Muort la direzia da vos cors ha Moses dau a vus quella prescripziun. Mo all'entschatta dalla scaffiziun ha Dieus scaffiu els sco um e femna. Perquei vegn igl um a bandunar bab e mumma e seligiar cun sia dunna: E quels dus vegnan ad esser ina carn. Els ein pia buca pli dus, mobein ina suletta carn. Bien pia, quei che Dieus ha uniu, duei il carstgaun buca spar-ter“.⁶ Jesus meina la lètg anavos tier siu *origin* e muossa sil plan che Dieus ha cun sia scaffiziun. El scuviera quei ch'era curclau entras l'arbitrariadad e la direzia dil cor dils carstgauns.

La lètg alzada alla dignitat d'in sacrament

⁴ Gen 3,3

⁵ Ro 5,12

⁶ Mc 10,5-9; mira era Mt 19,1-8 e Lc 16,18

La mort spindronta da Niessegner ha era consequenzas per la lètg. Sogn Paul fa attents sin quei entras numnar la lètg in *misteri*. Cun quella expressiun indichescha el ina realitat divina, ina realitat che regala il salit divin.⁷ La lètg vegn alzada alla *dignitat d'in sacrament*. Ella daventa en Cristus in liug da grazia. Conjugals cristians ein clamai da schar sentir e viver en lur lètg la fideivladad e carezia che Cristus ha viviu entochen la mort vid la crusch. Perquei animescha la Baselgia ils battegai da sepreparar sin la lètg sin fundament dalla cardientscha e da serrar lur lètg avon igl uestg, il spiritual ni il diacon. La veta communabla duei star sut la benedicziun dil sacrament.

La viva relaziun dils conjugals cun Cristus

Il senn dalla lètg consista ella statteivla cumionza da veta denter um e dunna, ella carezia e fideivladad vicendeivla ed el dar vinavon la veta.⁸ Quella finamira san conjugals contonscher, sch'els han ina profunda relaziun cul Segner, acceptan in l'auter en Cristus e vivan ord sia grazia. Da l'autra vart retscheiva la lètg la davosa profunditat e dignitat cheutras ch'ella ei il maletg dalla carezia da Cristus per sia Baselgia e dall'attaschonza dalla Baselgia enviers siu Signur.⁹

Ord la cardientscha en Cristus vegnan um e dunna a formar lur veta communabla e retscheiver forza. Cheu anflan els la fontauna per augmentar las vertids dalla veta matrimoniala, numnadamein la carezia exclusiva pil partenari da lètg, l'attaschonza, la fideivladad, il respect, la participaziun all'ovra divina dalla creaziun entras dar vinavon la veta, l'educaziun dils affons el spért dalla cardientscha. In grond agid ei la renovaziun dalla grazia sacramentala e dall'empermischun matrimoniala. Quei succeda entras urar di per di

⁷ conf. Ef 5,32

⁸ Conf. Catechissem dalla Baselgia catolica 1643-1654

⁹ Conf. Ef. 5,25-27

communablamein ed entras separticipar alla veta dalla Baselgia, en special entras far part la dumengia dalla celebrazion eucaristica ed entras retscheiver regularmein il sacrament dalla penetenzia. Bugen dun jeu era caschun a conjugals da prender annualmein part d'in di da reflecziun ensem cugl uestg, pia in di dalla lètg nua ch'els san scuvierer danovamein las valetas dalla ligia matrimoniala e nua ch'els san solemnamein renovar lur empermischuns.

L'educaziun alla lètg

La lètg ei igl origin dalla cuminanza humana ed il fundament dalla famiglia. A quei sto l'educaziun e la formaziun dils affons e giuvenils corrispunder. Ella brev pastoral digl onn vargau hai jeu fatg attents con impurtont ch'igl ei d'intermediar alla giuventetgna las valurs dalla veta cristiana.¹⁰ Oravontut ils geniturs duein dar vinavon quellas valurs. Leutier s'auda era la clamada ad ina lètg cristiana. Igl ei pensum dils geniturs da viver quella clamada a moda exemplarica e da plidar cun lur affons e giuvenils sur da sia muntada e bellezia. Ensemen cun lur affons vegnan els era ad urar per che lezs anflien la dretga via dalla veta ni il dretg partenari.

Medemamein astga la *reflexiun* sur dalla lètg cun giuvenils e giuvens carschi buca muncar ellas cuminonzas cristianas localas. Oravontut ella lavur cun la giuventetgna duei ins prender la caschun da palesar als carstgauns giuvens la muntada d'ina lètg cristiana. Finalmein vegn ins a prender sufficientamein temps per *preparar* ils spusai da retscheiver il sacrament dalla lètg, per ch'ils giuvens pèrs sappien, confortai ella cardientscha, entrar ella ligia matrimoniala.

La vertid dalla castiadad

La preparaziun alla lètg dependa stretgamein dall'edu-caziun ad ina

¹⁰ In plaid per la giuventetgna – in plaid alla giuventetgna, p. 4

veta sexuala ordinada e responsada neu dalla cardientscha. Quei succeda en emprema lingia ella famiglia ed astga buca vegrir sur-schau al spért dall'educaziun sexuala publica ch'ei distaccaus dalla cardientscha. Ils geniturs vegnan ad insister ch'els han il dretg per l'educaziun sexuala da lur affons e giuvenils ed els vegnan era a praticar lur dretg. Leutier san els seschar sustener da persunas che sesentan obligai alla ductrina dalla Baselgia. Ils carstgauns giuvens duein emprender da capir e respectar lur sexualitat sco dun da Diu en favur dalla creaziun. Ina tala educaziun muossa era la muntada dall'*abstinenza*, la vertid dalla castiadad. Per saver viver sia sexualitat a moda ordinada ed el senn dil creatur, eis ei impurtont ch'il carstgaun giuden exerciteschi l'abstinenza sexuala. Igl ei legreivel ch'ei dat en bia loghens sil mund gruppaziuns da carstgauns giuvens e famiglias che sestentan per ina buna preparaziun sin la lètg che corrispunda alla cardientscha cristiana e per l'abstinenza sexuala avon la lètg.

Frars e soras en Cristus, la clamada ad ina lètg cristiana duei entusiasmari bia carstgauns giuvens e dar a lur veta senn e cuntegn. Da l'autra vart duei ei esser per conjugals in fundament per viver sco Baselgia da casa e da setschentar adina puspei sut la *protecziun della sontga Famiglia*, da Jesus, Maria e sogn Giusep. Lur intercessiun porti a tuts ina pli profunda enconuschientscha dil plan che Dieus ha cun sia scaffiziu e la forza da corrispunder a quei plan. Aschia giavischel jeu da cor in benediu temps da preparaziun sin la fiasta dalla levada da Niessegner e dun bugen a tuts mia benedicziun episcopala.

Vies uestg

✠ Vitus